


特別
18
3414
9





門 18
號 3414
卷 9

御訂全金詩增補中州集卷二十八


金元好問原本

許司諫古

四首

古字道真承安中進士在宣宗朝以直言
極諫稱哀宗即位首命驛致之洛致仕授
右司諫未幾乞身還伊陽

閒閒公制詞云
安車蒲輪天子



大正 25.6.22
昭和 25.6.22
東京 赤

所以厚優賢之禮黃冠野服人臣所以遂
歸老之心其恩榮足以兩全而前後不可
多得有臣如此如卿幾人具官道直以方
氣剛而大議論非世儒所到名節以古人
自期擢自先朝置之諫列斥安昌竊位已
聞折檻之忠及梁冀伏辜方見埋輪之志
朕卽大位稔聞直聲起之於田里退閒之
閒趨之於侍從論思之地完備始終之節
從容進退之閒歎陽城之敢言惜其將去
念孔殘之旣老挽之莫留特進一階榮躋
四秩華山拂袖最是爲世上之閒神武挂
冠猶不負山中之相勉終晚節益介壽祺
郡守爲起伊川亭道真性嗜酒老而未衰
每乘舟出村落閒留飲或十數日不歸及

泝流而上老稚奔走爭爲之挽舟數十里
不絕其爲時人愛慕如此正大七年年七
十四卒前三日有書見及字已歆傾矣

補歸潛志許司諫古字道真河閒人父安
仁子靜名士汾陽軍節度使公少擢第南
渡爲侍御史時丞相术虎高琪擅權變亂
祖宗法度公上章劾之上知其忠常庇翼
之凡有奏下尚書省輒去其姓名然竟爲

高琪所中貶鳳翔幕正大初召爲補闕遷
左司諫言事稍不及昔時後致仕居嵩山
下病卒平生好爲詩及書然不爲士大夫
所重公論但稱其直云初貶鳳翔朝士畏
高琪故皆不敢與言余先子時爲提舉南
京權貸事獨以詩送之有云有晉必無楚
兩雄難並驅向來旣發藥其可止半途又
曰君年迫桑榆隻身憂患餘雙親白楊拱

同氣紫荆枯貧無孟光春醉無驥子扶唯
有忠義名可與天壤俱蓋欲堅其初志也
聞者竦然多傳之後爲鳳翔錄事先人又
寄以詩云寄語多言唐諫議生還記取李
師中亦此意也

青柯平二道人

深谷緣危磴長林繞碧山山中四時好方外兩翁
閒身世青雲上塵埃大夢閒高情應笑我才到却

空還

被名過少室

老病無堪合退休伊川久已得菟裘如今又上長
安道好被青山笑白頭

扇圖

雲壓溪塘小雪春融融和氣浥輕塵山禽共作梅
花夢物性由來嬾是真

訪箕和尚峴山

箕出衣冠家在三屯山中有元夕懷京都詩
云一燈明處萬燈明天上人閒不夜城前日
惠林洪覺範雪窓孤坐聽猿聲甚爲時人所
稱

山中風定夜沈沈月滿禪林靜客心蒼檜四排嚴
法界孤松中立殷潮音鼓鐘有節人如玉臺殿無
塵地布金二月來游春尚淺紅梅無數照山陰

附許古諫南伐疏昔大定初宋人犯宿州

已而屢敗世宗料其不敢遽乞和乃勅元帥府遣人議之自是太平幾三十年泰和中韓侂胄妄開邊釁章宗遣駙馬僕散揆討之揆慮兵興費重不能久支陰遣侂胄族人齎乃祖琦畫像及家牒僞爲歸附以見丘崇因之繼好振旅而還夫以世宗章宗之隆府庫充實天下富庶猶先俯屈以卽成功告之祖廟書之史冊爲萬世美談

今其可不務乎今大兵少息若復南邊無事則太平不遠矣或謂耑用威武可使宋人屈服此殆虛言不究實用藉今時勢小捷亦不足多賀彼見吾勢大必堅守不出我軍倉卒無得須還以就糧彼復乘而襲之使我欲戰不得欲退不能則休兵之期乃未見也願陛下畧近功慮後患不勝幸甚

附歸潛志貞祐閒木虎高琪爲相欲樹黨固其權先擢用文人將以爲羽翼已而臺諫官許古劉元規之徒見其恣橫相繼言之高琪大怒斥罷二人因此大惡進士更用胥吏彼喜其獎拔往往爲盡心於是吏權大盛勝進士矣又高琪定制省部寺監官共注進士吏員文使由郡轉部由部轉臺省不三五年皆得要職士大夫反畏避

其鋒而宣宗亦喜此曹刻深故時全由小吏侍東宮至爲僉樞密院事南渡後吏權大盛其遷與進士等甚者反疾焉故一時之人爭以此進故士大夫家有子弟讀書往往不終輒輟令改試臺部令史其子弟輩旣習此業便與進士爲讐其趨進舉止全學吏曹至有舞文納賄甚於吏輩者惟僥倖一時進用不顧平日源流此可爲長

太息者也

附歸潛志省吏前朝止用胥吏號堂後官

金朝大定初張本師浩

闕

宰

執子試補外雜用進士凡登第歷三任至
縣令以次召補充一考三十月出得六品
州倅兩考六十月得五品節度副使留守
判官或就選為知除知案由之以漸得都
事左右司員外郎郎中故仕進者以此途

右司郎中員外郎首領官取其簿書精幹
也由左右首領官選宰相執政取其奏對
詳敏也其經濟大畧安在哉此所以在位
者多長於吏事也

王防禦良臣

一十首

補一首

良臣字大用潞人承安五年進士作詩以敏捷稱又於內典有所得入翰林與李欽叔善從軍南征欽亦與行道中酬唱甚多有詩云蕎花冉冉蜜脾香禾穗纍纍鶻眼黃一縷晚烟吹不去為誰著意護秋霜欽叔愛之興定初自請北行沒於軍中贈孟州防禦使

全金詩卷二十八
補歸潛志王翰林良臣字大用潞州人長
於律詩尖新工對屬南渡在館後從李天
英北征遇害其上移刺總管云筆底有神
扶氣力人間無處著聲名人多傳之

送任李二生赴舉

塵澀鰲鈞公子恨風吹馬耳謫仙愁皇天老眼成
人晚今日男兒得志秋官樣文章堆筆底世情風
色候江頭主司不是冬烘物五色迷人莫浪憂

汴堤懷古

迷仙樓觀鬱連空一日都歸鬼唾中奢則兆亡天
聽邇去而不返水聲東鎖烟弱柳愁蛾綠閣雨幽
花淚臉紅總爲錦帆歸不得至今啼鳥怨東風

旬休飲

嫋嫋東風雪外還又催春色動谿山百年莫作千
年調十日須謀一日閒千丈歸心詩卷裏一襟豪
氣酒杯閒醉鞭約住黃昏月馬首低懸玉半環

息軒

乾沒皇皇西復東不知假息禍機中黃金一旦隨
肱篋腐骨千年副攬蓬世味甜於刀上蜜人心苦
是蓼中蟲一菴松雪雙明底笑殺西山槁項翁

九月七日飲

紫霞零落帶孤禽平楚蒼蒼秋意深月過初三半
梳玉菊迎重九滿籬金天憐病骨商量暖雲促歸
程計會陰風鴈飛來更瀟灑一枝蘆雪印波心

牧牛圖

三摩不受一塵侵本分工夫日念深杖屨得迴遊
子脚葛藤灰盡老婆心顛狂不作風頭絮出入誰
傷井底金迴首人牛在何許一江明月夜沈沈

狸奴畫軸

三生白老與烏員又現吳生小筆前乞與黃家禳
鼠禍莫教虛費買魚錢

雜詩三首

道人知我愛禪房
淨埽階前紫石牀
軟飽三杯風味好
脫巾和月臥昏黃

老子平生酷愛閒
天教行處得禪關
粥魚敲落簷頭月
猶在梅花醉夢閒

殘陽收拾弟兄行
揀得機心不到鄉
安置小奴今夜夢
蘆花風細月如霜

絕句

流轉年光橋下水
翻騰時態嶺頭雲
溪翁道號奇

聾子除却松風百不聞

高治中廷玉

四首

廷玉字獻臣恩州人大定末進士章宗衛
王朝甚有時名爲人豪爽尚氣節一時名
士多歸之貞祐初自左右司郎官出爲河
南府治中與知府復興屢以公事相可否
時都城受圍使驛阻絕復興爲安撫副使
懼獻臣謀已乃以造逆訊之獻臣就逮龐
才卿雷希顏王士衡辛敬之皆被羅織幾

有一網之禍比赦至獻臣瘐死矣獻臣多
作詩賦海中牛頭云鑿開混沌竅闖出神
農首人多稱道之猶子廣之今在河平

補歸潛志高左司庭玉字獻臣遼東人少
擢第入官有能聲吏事明敏人莫能及尤
倣儻重氣節爲左司郎中名譽甚重一時
人士推仰焉貞祐初出爲河南府治中主
帥溫迪罕福興奸僞人也公臨事少不遜

讓遂交惡是時北兵圍燕都事已迫四方
無勤王師公獨慨然有赴援意屢以言激
福興福興憚之因誣以有異志輒收赴獄
名士如龐才卿雷希顏辛敬之皆連繫考
掠無實然公竟爲福興所困死獄中餘會
赦得釋公旣卒朝命下除公河南路安撫
副使代福興士夫痛憤後朝廷知其冤謫
福興遠郡昭雪之屏山於人材少許可至

論公獨以爲真濟世材又言其學術端正
可以爲吾道砥柱時之不幸爲奸人所害
屏山以詩哭之甚哀雷希顏又爲文以祭
述其事爲時所稱屏山又將文其碑未著
死後其子屬之雷公雷以其讐人猶在也
亦未著迄今事狀不詳惜哉公詩亦高余
家有數十篇遭亂失去嘗記其中秋詩有
云跳上玉龍背抱得銀蟾光亦奇語也

天津橋同李之純待月一首

驂鸞追散仙乘槎抵銀潢跳上玉龍背抱得銀蟾
光素娥愁不歸再拜捧瑤觴問以天上事玉色儼
以莊爾能爲我歌白雪我亦爲爾搗玄霜不然藉
我廣寒殿與我長作無何鄉傍有謫仙人拍手笑
我狂天風忽吹散人月兩茫茫

柳絮

斷送春歸去紛飛不暫停和風三徑雪微雨一池

萍蝶惹依芳草蜂沾過小庭靜宜投隙地狂欲攪
青冥得得穿朱戶時時撲翠屏黃鶯枝上語似與
訴飄零

道出平州寒食憶家

柳色方濃別玉京程程又值石龜城山重水複人
千里月苦風酸鴈一聲上國春風桃葉渡東陽寒
食杏花餉楚魂蜀魄偏相妬兩地悠悠寄此情

飛山怨

漢家自有飛將軍軍中駭歎箭有神一朝乃與獄
吏對惜無千金書牘背手把屬鏤口銜鬚號天者
三我何辜伊吾壯志長已矣不得提攜玉龍死可
憐休唱白浮鳩符至今秦人悲杜郵

李治中適 六首

適字平甫樂城人明昌二年進士高才博
學無所不通爲人滑稽多智而不欲表表
自見工畫山水得前輩不傳之妙龍虎亦
入妙品然皆其餘事也泰和中大興幕官
時虎賊知府事賣權恃勢奴視同列平甫
每以公事相可否不少假藉又摘其陰事
數十條欲發之虎謀篡者也聲勢焰焰人

莫敢仰視乃爲一書生所抗積不平先以
非罪誣染之幾至不測雖有以自解竟坐
是仕宦不進以東平治中致仕閒居陽翟
十餘年自號寄庵先生平生詩文甚多如
云舊管新收粧鏡在昨非今是酒杯乾贈
筆工云工不能書何以筆士須知筆乃能
書感事云半錢利路人乃虎一鈎名餌吾
其魚魯山道中云老夫自喜林野僻路人

頗笑衣裳寬散失之餘不復全見矣臨終
戒家人吾明日歸而輩慎勿遽哭果如期
而逝家人哭不禁良久開目云戒汝勿哭
令我心識散亂言畢目復瞑其明了又如
此子治字仁卿正大七年收世科屏山贈
詩所謂仁卿不是人間物太白精神義山
骨者也

贈中山楊果正卿

士道彫喪愁天公陰霾慘慘塵濛濛三冬不雪春
未雨野桃無恙城西紅春光爲誰作駘蕩造物若
我哀龍鍾數行墨浪合眼死一包閒氣終身窮中
山公子文章雄雅隨童稚爲彫蟲禰衡不遇孔文
舉坡老懶事陳元龍唯之與阿將無同乾坤萬里
雙飛蓬飄飄南北東西風

江村

陸地無根客江村有髮僧兩盂殘喘粥一寸苦吟

燈

集句題廣寧勝覽亭

簷前無數好峰巒醉眼詩腸冰雪寒不識間山真
面目請君來此凭闌干

獅子峰

解脫眼光三界靜端公伎倆一時休雲開正使金
毛現子細看來是石頭

送窮

昔年曾作送窮詩結柳齋糧擬退之送去還來還
復語君家猶有讀書兒

使高麗

去國五千里馬頭猶向東宦情蕉葉鹿世味蓼心
蟲倦枕三更夢征衫八月風山川秋滿眼歸思寄
孤鴻

陳司諫規

二首

規字正叔稷山人明昌五年進士博學能
文詩亦有律度爲人敦厚動有禮節南渡
以後諫官稱許古陳規而正叔不以訐直
自名尤見重云仕至右司諫卒官子良臣
今在燕中

補歸潛志陳司諫規字正叔絳州人弱冠
擢第南渡爲監察御史上便宜十事直言

當時得失忤旨出爲徐州帥府經歷官正大初收用舊人召爲右司諫數上書論事改刑部郎中以事罷再爲補闕復拜司諫言事不少衰朝望甚重凡宮中舉事上曰恐陳規有言近臣竊議惟畏陳正叔挺然一時直士也後出爲中京副留守未赴卒於圍城士論惜之公爲人剛毅質實有古人風篤學問至老不廢晚喜爲詩與趙閒

閒諸公唱酬其弔人詩有云驄馬餘威行尚避仙鳧善政去猶思人以爲頗的初先人見其所上十事歎曰宰相材也惜乎朝廷不能用後同朝相見甚歡未幾先人下世余復從之游每論及時事輒憤惋蓋傷其言之不行也死之日家無一金知交爲葬之

送雷御史希顏罷官南歸

五事前陳志拂劇屹如砥柱閱顏波一麾共惜延年去三黜何傷柳季和連蹇仕途如我老激昂衰俗在君多扁舟南去知難戀萬頃烟波一釣蓑

過驪山

豐鎬無由問故基三章止見黍離詩而今多少華清石都與行人刻艷辭

馮內翰延登

一十七首

延登字子駿吉州人承安二年進士令寧邊日適閒閒公守此州與之考論文義相得甚歡故子駿詩文皆有律度正大未奉命北使見留使招鳳翔不從欲殺者久之割其鬚髯羈管豐州二年乃得還天興初元授禮部侍郎京城陷自投井中子駿資稟淳雅與人交殊款曲讀書長於易左氏

傳好賢樂善有前輩風調嘗欲作國朝百
家詩而不及也有集號橫溪翁予過大名
見於其子源如賦德順道院隴泉云玉壘
制方維瓊漿闕仙宅何人劬雲根一旦泄
地脉金匱鎖龍瘖月窟逗蟾液銅壺漏水
清玉斗天醴碧光搖日千道影落天一席
窈然讐池穴自與天壤隔又登封途中遇
雨留僧舍云濕雲若烟低飛雨如矢集近

山衣已涼薄寒復相襲霽景函草木秋意
滿原隰林紅寒更殷山翠晴更濕不知高
幾許但見蒼壁立羣峰誰暇數庭笋紛戢
戢騰擲來眼中左右疲顧揖皆其得意句
也

補歸潛志馮吏部延登字子駿吉州人少
擢第南渡爲太常博士累遷吏部郎中翰
林待制奉使北朝踰年歸遷吏部侍郎遭

亂不知所終公爲人謹愿吏事亦精篤學
問長年猶不輟在公署日鈔書爲文苦思
尚奇澀詩亦新巧可稱與余先子交最善
先子入翰林公與趙閒閒所薦也平生著
述甚多嘗以示余亂後失散可惜

鄆城道中

北風慘澹揚沙塵鄆西三日無行人十村九村雞
犬靜高田下田狐兔馴昨朝屏息過溪口知有白

額藏深榛赤子弄兵更可惻路旁僵屍衣血新野
叟偃僂行拾薪欲語辟易如驚麕瘦梅疎竹未慰
眼只有清淚沾衣巾

元日隆安道中

山岡重複三竿日溪路縈迴一席天老境飄零情
更惡又從馬上得新年

宿三家寺

老栢蒼蒼纏老藤招提牢落有殘僧暝禽自入藏

經閣饑鼠時窺照佛燈未得安心如北秀却思覓
法趁南能濛濛雨暗門前路更得雲房一曲肱

代郡楊黻之與余同辰月日時亦然渠有詩
因爲次韻

陰陽亶亶定何如自信祥金先有模曾見唐生談
躍馬豈知阮籍哭窮途倦游笑我衰髯白弄筆憐
君醉袖烏便欲移書與歐九畧分餘論爲噓枯

寄笏青柯平

飛雪驚沙捲屋茅清寒潑水透綈袍松風度壑江
聲遠蘿月當軒扇影高敢對名山談世事不妨空
腹貯離騷且將手版牢藏起政恐山人識馬曹

射虎得山字

田翁太息論三害獵騎俄驚見一斑涎口風生雷
吼怒角弓寒勁月痕彎柳營共許千人敵魚服仍
餘一矢還我欲殘年賞神駿短衣匹馬夢南山

雪

破屋寒無那庭空雪已深山川非舊觀松栢見貞
心凍雀爭遺粒棲鴉點暮林攜琴訪溪友清興憶
山陰

華清故宮

寵貴羊羔退曲江華清霧閣對雲窓層巒未了霓
裳舞遷客俄驚羯鼓腔簷際疎星疑曉鏡天邊晴
樹認高幢遊人尚喜風流在白石涵波皂莢雙

西園得西字

芳逕層巒百鳥啼芝廬蘭畹自成蹊仙舟倒影涵
魚藻畫棟銷香落燕泥淑景晴薰紅樹暖蕙風輕
汎碧叢低岡頭醉夢俄驚覺歌吹誰家在竹西

八月十四日宿官塔下院二首

野僧引客看修竹拄杖入林驚瞑禽一道細泉鳴
蘚磴恍如閒聽穎師琴

喬松修竹翠交陰涼月玲瓏地布金老嬾無詩酬
節物夜涼閒聽候蟲吟

探春得波字

好雨新晴景氣和東陂冰盡水增波
茅茨影裏燕雙語桃李梢頭春幾何
霽靄未收芳陌潤斜陽偏傍小樓多
雕鞍畫轂方爭道更得留連藉綠莎

春雨二首

山市人歸暮雨飛倚筇久立看簷霏
乍來勢若懸麻密暫止聲如鼓
瑟希砌下蟻歸低赤幘簾閒燕入濕
烏衣今宵客夢知安穩厭浥新涼到枕幃

小雨濛濛潤土膏谷風習習不驚條
晨烟半濕低平野春水初生沒斷橋
已見鶯黃勻柳麥更看檀紫上榆椒
從今樂事知相繼櫛比雲平看隴苗

藤花得春字

白白紅紅委暗塵蒼藤次第看花新
龍蛇奮起三冬蟄纓絡紛垂百尺身
見說紫雲偏得意不知翠幄巧藏春
齋厨晚甌清香滿未信侯門有八珍

蘭子野晚節軒

華顛益信寸心丹直道寧論末路難不歎士元淹
驥足但憂仲叔累猪肝籬根佳菊分秋色簷外長
松耐歲寒几有琴書罇有酒却愁兒輩覺清歡

洮石硯

鸚鵡洲前抱石歸琢來猶自帶清輝芸窓盡日無
人到坐看玄雲吐翠微

附元好問跋松庵馮文書士大夫有天下
重名然其詩筆字畫大有不能稱副者閒

閒公有言以人品取字畫其失自歐公始
如吾松庵丈詩筆字畫皆不減古人以人
品取之歐公之言亦不爲過必有能辨之
者

御訂全金詩增補中州集卷二十九

金元好問原本

劉鄧州祖謙 三首

祖謙字光甫安邑人承安五年進士歷州
縣有政迹拜監察御史以鯁直稱其不能
俯仰世好蓋天性然也正大初為右司都

全金詩卷二十九
事除武勝軍節度副使召爲翰林修撰家
多藏書金石遺文畧備父東軒工畫山水
故光甫以鑒裁自名至於信筆作簡牘尤
有可觀一時名士如雷御史淵李內翰獻
能王右司渥皆遊其門得人一詩可傳必
殷勤稱道唯恐不聞人以此稱之子敏仲
今在平陽

補歸潛志劉翰林祖謙字光甫解州人少

擢第爲吏有聲由寧陵令丁父憂數年不
調南渡召爲大理司直拜監察御史出爲
河南府判官再召爲翰林修撰遭亂北遷
爲兵士所殺公博學通佛老百家書從趙
閒閒李屏山諸公遊甚爲所重談論亶亶
不窮援筆爲文奇士也嘗請屏山誌其父
墓屏山以事廢命余代焉銘辭屏山筆也
迨屏山歿公以文祭有曰鳳不足以言瑞

龜不足以效靈吾視之其猶龍也諸公稱
之與余父子交嘗屬余作蒲萄酒賦題其
父所畫河山形勢詩亦一知己也

雅集圖

翠雀翩翩野鶴孤玉京人物會仙圖後來且莫輕
題品席上揮毫有大蘇

崆峒山圖爲橫溪翁二首

好奇仍有客相攜絕頂披雲快一躋三十六峰青

似染五年拄笏羨橫溪

獨占名山每羨渠京塵今日汗吟鬚西州十載經
行處惆悵雲烟是畫圖

高博州憲

八首

憲字仲常遼東人祖衍字穆仲國初進士
仕至吏部尚書伯父守義大定十六年進
士父守信以蔭補官叔守禮宣徽使仲常
黃華之甥幼學於外家故詩筆字畫俱有
舅氏之風天資穎悟博學強記在太學中
諸人莫敢與抗泰和三年乙科登第自言
於世味澹無所好惟生死文字閒而已使

世有東坡雖相去萬里亦當往拜之屏山
故人外傳說仲常年未三十作詩已數千
首矣釋褐博州防禦判官遼陽破沒於兵

閒

元夕無燈

九陌無燈夜悄然小紅時見點春烟多情惟有梅
梢月拍酒樓頭照管絃

寄李天英

稻稭蒼蒼陂已枯西風剪剪弄楸梧蒹葭水落魚
梁迴蟋蟀聲高山驛孤社甕新成元亮酒并刀細
落季膺鱸作詩遠寄霜前鴈人在海東天一隅

題新山寺壁

列壑攢峰發興新落花飛絮舞餘春虛堂坐視三
千界冠者相從五六月澗草軟宜承屐齒溪泉清
可濯纓塵靜聽山鳥松風裏始悟人間樂未真

焚香六言四首

抹利花心曉露薺薇萼底溫風洗念六根塵外忘
情一炷烟中

滿地落花春曉一簾微雨輕陰正要金蕉引睡不
妨玉隴知音

紙帳收烟密下松灰卷火常虛午寂春閒小睡人
閒自有華胥

沈水濃薰甲煎宮梅細點波津奕奕非烟非霧依
依如幻如真

長城

秦人一鍛連雞翼六國蕭條九州一祖龍跋扈侈
心開牛豕生民副礎礧詩書簡冊一炬空欲與三
五爭相雄阿房未了蜀山上石梁擬駕滄溟東生
人膏血俱枯竭更築長城限裘褐臥龍隱隱半天
下首出天山尾遼碣豈知亡秦非外胡宮中指鹿
皆庸奴驪原宿草猶未變成陽三月爲丘墟黃沙
白草彌秋塞惟有坡陁故基在短衣匹馬獨歸時

千古興亡成一慨

附堯山堂外紀遼陽張仲澤汝霖春溪詩
云黯黯春愁底處消小桃無語半含嬌東
風不管前溪水暖綠溶溶拍畫橋高仲常
憲元夕無燈詩云九陌無燈夜悄然小紅
時見點春烟多情唯有梅梢月拍酒樓頭
照管絃仲常黃華之甥黃華又仲澤之甥
其淵源有自云

王監使特起

七首

特起字正之代州崞縣人智識精深好學
善論議音樂技藝無所不能長於辭賦出
入經史摘其英華以爲句讀如天造神出
至得意不減郭黼在張代州門下與屏山
爲忘年友泰和三年進士甲科調真定府
錄事參軍有惠政民立碑頌其遺愛改令
沁原又遷司竹監使朝議欲以館職召試

會卒遊龍德宮聯句云棘猴未窮巧槐蟻
或失王賦雙峰競秀云龍頭蠹雙角駝背
堆寒峰華山云三峰盤地軸一水落天紳
造化無遺巧丹青總失真閒閒公屢哦此
詩以爲妙

補歸潛志王特起正之代州崞縣人少工
詞賦有聲年四十餘方擢第作詩極高嘗
有龍德聯句爲時所稱晚年娶一側室留

別一樂章喜遷鶯至今人傳之餘詩惜不
多見嘗爲沁源令政頗嚴後爲司竹監官
疾卒

沁源山中

起令沁源為
政頗嚴

野夫不識武城宰問之無言色微改但說今年秋
雨多黃芪滿谷無人采踏遍西城錦石盤莫投佛
屋解征鞍隔林依約見燈火山谷人家初夜寒

挽張代州詞

大節

砥柱堂堂閱潰川
諫書一紙力回天
兩朝眷倚傳
龜玉五郡歡謠被
管絃芟舍棠陰餘
舊綠夜臺松
月耿孤圓行人謾
灑碑前淚誰識顏
公是地仙

謾作

有時幽鳥話心事
無限秋蟲誇口才
北闕上書吾
老矣東籬把菊思
悠哉竹林留得巨
源在蓮社招
入淵明來不然
餘子敗人意
懷抱耿耿胡爲開

偶作

人情爭勝似爭碁
死怕輸人一著遲
黑白不分傍
袖手年來吾亦愛
吾癡

絕句二首

山勢奔騰如逸馬
水流委曲似驚蛇
溪靈不欲露
天巧眼力未到雲
先遮

鳥語留春春已迴
落花隨意臥蒼苔
清明寒食因
循過萱草薔薇次
第開

下第

人閒萬事等樗蒲敢謂何人不得盧勝負到頭俱
偶爾狂夫安用繞牀呼

李經 五首

經字天英大定人作詩極刻苦如欲絕去
翰墨蹊逕閒者李趙諸人頗稱道之嘗有
詩云鴈奴失寒更拍拍叫秋水天長夢已
盡秋思紛難理最爲得意其餘或有不可
曉者累舉不第卒

補歸潛志李經天英錦州人少有異才入
太學肄業屏山見其詩曰真今世太白也

全金詩卷二十九
盛稱諸公閒由是名大震字畫亦絕人再
舉不第拂衣歸南渡後其鄉帥有表至朝
廷士大夫識之曰此天英筆也朝議以武
功就命倅其州後不知所終天英爲詩刻
苦喜出奇語不蹈襲前人妙處人莫能及
號無塵道人題太真圖云君前欲拜還未
拜花枝無力東風羞又夜雨云燈火萬家
夜蕭蕭簾下聲晚望云夕陽萬里眼人立

秋黃中夜起云夜起不得月河漢空星辰
又步雲意云一片崑崙心夕陽小烟樹又
四言云老峰蹶雲壁立挽秀林陰灑雨蒼
蒼玉鬪虛明滿鏡夜氣成晝此其詩體也

雜詩五首

長河老秋凍馬怯冰未牢河山吟鞭底日莫風更
號

晨井凍不爨誰療壯士饑天廡玉山禾不救我馬

禮

塵埃汨沒伺候工離騷不振矜魚蟲風雲誰復話
著蔡不圖履豨哀屠龍挾牋搦管坐書空咿嚶堂
上酣歌鐘乃知造物戲兒童不妨遠目送歸鴻莫
怪魏匏無所容此去未許江船東五經不埽途轍
窮門庭日月生皇風太阿補室礪以石坐埽鸛鶴
搖天雄

巖椒鬱雲日夕生陰雨雪縞夜秋黃老林人烟墨

突樵徑雲深

造物開巖地巖帳揜劍壁苔花張古錦霜苦老秋
碧日夕雲竇陰風鼓泉湧石馬蹄忌磽确樵道生
枳棘盤盤出井底迴首悵如失長老不耐事底事
挂塵迹披雲出山椒白鳥表林隙

附書史會要李經少有異才字畫亦絕人

附趙秉文答李天英書天英足下自足下

失意東歸無日不思悅如三歲向得來音

甚悉動靜爲慰所望所寄雜詩疾讀數過
擊節屢歎足下天才英逸不假繩削豈復
老夫所可擬議然似受之天而不受之人
屢欲貢悃誠山川閒之坐成浮沉况勤厚
如此過望黠化僕非其人筆拙思荒自濡
其涸况望餘波耶豈以犬馬齒在前欲俯
就先後進禮耶聊布一二所聞於師傅閒
者幸恕不揆嘗謂古人之詩各得其一偏

又多其性似者若陶淵明謝靈運韋蘇州
王維柳子厚白居易得其冲淡江淹鮑明
遠李白李賀得其峭峻孟東野賈浪仙又
得其幽憂不平之氣若老杜可謂兼之矣
然杜陵知詩之爲詩未知不詩之爲詩而
韓愈又以古文之渾浩溢而爲詩然後古
今之變盡矣太白詞勝於理樂天理勝於
詞東坡又以太白之豪樂天之理合而爲

全金詩卷二十一
一是以高視古人然亦不能廢古人足下
以唐宋詩人得處雖能免俗殊乏風雅過
矣所謂近風雅豈規規然如晉宋詞人蹈
襲用一律耶若曰子厚近古退之變古此
屏山守株之論非僕所敢知也詩至於李
杜以爲未足是畫至於無形聽至於無聲
其爲怪且迂也甚矣其於書也亦然足下
立言措意不蹈襲前人一語此最詩人妙

處然亦從古人中入譬如彈琴不師譜稱
物不師衡上匠不師繩墨獨自師心雖終
身無成可也故爲文當師六經左丘明莊
周太史公賈誼劉向揚雄韓愈爲詩當師
三百篇離騷文選古詩十九首下及李杜
學書當師三代金石鍾王歐虞顏柳盡得
諸人所長然後卓然自成一家非有意於
專師古人也亦非有意於專擯古人也自

書契以來未有離古人而獨立者若揚子
雲不師古人然亦有擬相如四賦韓退之
惟陳言之務去若進學解則客難之變也
南山詩則子厚之餘也豈遽汗漫自師胸
臆至不成語然後爲快哉然此詩人造語
之工古人謂之一藝可也至於詩文之意
當以明王道輔教化爲主六經吾師也可
以一藝名之哉賈誼董仲舒司馬遷揚子

雲韓愈歐陽修司馬溫公文儒之文也僕
未之能學焉梁肅裴休晁迥張旼盡名理
之文也吾師之太白杜陵東坡詞人之文
也吾師其辭不師其意淵明樂天高士之
詩也吾師其意不師其詞然吾老矣眼昏
力綿雖欲學古人力不足也足下來書自
言近日欲作大字然滯於藏鋒不能飛動
詩欲古體然僻於幽隱不能豪放足下自

知之僕尚何言然藏鋒書之一端所貴徧
學古人昔人謂之法書豈是率意而爲之
也又須真積力久自楷法中來前人所謂
未有未能坐而能走者飛動乃吾輩胸中
之妙非所學也若市人能積學而不能飛
動吾輩能飛動而不能積學皆一偏之弊
耳東坡論五十八草書似鶯哥嬌數日相
見曰此書何如曰乃秦吉了耳足下之書

無乃近似之乎精神所注閒出奇逸稍怠
之際如病痺腫得免秦吉了足矣想當捧
腹大笑也寄來詩如雜詩五首老昏殊不
可曉然此迄今大成不過長吉盧仝合而
爲一未能以故爲新以俗爲雅非所望於
吾友也昔人有吹簫學鳳鳴者鳳鳴不可
得聞時有梟音耳君詩母乃閒有梟音乎
向者屏山嘗語足下云自李賀死二百年

無此作矣理誠有之僕亦云然李公愛才
然愛足下之深者宜莫如老夫願足下以
古人之心爲心不願足下受之天而不受
之人如世輕薄子也與足下心知故道此
意幸少安無躁

梁太常持勝 一首

持勝字經甫絳州人本名洵義避宣宗諱
改父襄字公贊大定初進士質直尚義有
古人之風仕至保大軍節度使有諫興陵
田獵表傳於世其賀章宗卽大位表云曾
天子祖天子世嫡相承舜何人予何人自
強不息又自河南府倅移華州防禦使謝
上表云昔同雒邑已陪嵩嶽之呼今領華

防願效封人之祝世亦稱之經甫泰和六年進士制策優等宏辭亦中選爲人儀觀雄偉以文武志膽見稱貞祐初由太學博士爲咸平治中宗室承裕辟爲僚佐承裕死太平謀不軌以兵脇經甫使作文移經甫大罵不從卽日遇害時年三十六贈韓州刺史初赴官有詩云山雲欲雨花先慘客路無人鳥亦悲人以爲讖云

海棠

野杏山桃委路塵芳華都屬錦城春只緣造物偏留意任使無香亦可人粉白謾誇粧樣巧胭脂難染睡痕新沈香亭子勾欄畔消得君王比太真

愚軒居士趙元

三十四首

補一首

元字宜之定襄人經童出身舉進士不中
以年及調鞏西簿未幾失明自少日博通
書傳作詩有規矩泰和以後有詩名河東
李屏山爲賦愚軒有落筆突兀無黃初之
句愚軒宜之自號也用是名益重南渡以
後往來洛西山中閒閒公雷御史王子文
許至忠崔懷祖皆愛之所至必虛左以待

爲人有材幹處事詳雅旣病廢無所營爲
萬慮一歸於詩故詩益工若其五言平淡
處他人未易造也宜之之父名淑字清臣
由門資叙與先隴城爲莫逆交故好問交
游開得宜之之詩爲多子顓有隱節今居
鄉里

補歸潛志趙宜祿宜之忻州人幼舉童子
第及壯病目失明自號愚軒居士高才能

詩其所讀書皆自少時不忘居西山下以
吟咏爲樂名士無不與游趙李諸公甚重
之屏山常賦愚軒云我雖有眼不如無安
得恰似愚軒愚後病歿有愚軒集送辛敬
之云李白久矣騎長鯨後五百歲之純生

鄰婦哭

鄰婦哭哭聲苦一家十口今存五我親問之亡者
誰兒郎被殺夫遭虜鄰婦哭哭聲哀兒郎未埋夫

未迴燒殘破屋不暇葺田疇失鋤多草萊鄰婦哭
哭不停應當門戶無餘丁追胥夜至星火急并州
運米雲中行

渡洛口

一脉寒流兩岸冰斷橋無力強支撐忘機羨殺沙
鷗鳥不省人間有戰爭

書懷繼元弟裕之韻四首

著龜不須問我命只自知多生墮宿業世網纏綿

之驂騮受羈銜大笑跛鼈遲跛鼈亦復笑縮首甘
自卑何必參漆園物理本自齊檳榔可消穀志士
常苦饑穆之萬人雄猶不免此譏我懦更多病區
區欲何爲鐘鼎不可倖藜藿分所宜安能如黃蜂
爲人填蜜脾清白儻少汗平聲後人何所貽初學悔
大謬篆刻工文辭年來厭酸醎淡愛陶潛詩愛詩
固自佳其如未忘機回頭四十年言動俱成非誰
能逐世利日久常規規惟當種溪田與子常相期

金詩卷二十九
三
窓扉有生意山閒春到時長安冠蓋塵游哉不如
茲西疇將有事老農真吾師不見元魯山夢寐役
所思遺山乃其後僻處政坐詩時復一相過照眼
珊瑚枝奇書多攜來爲子臥聽之

少從白衫游氣與山崢嶸一念墮文字腸腹期拄
撐多機天所災室暗燈不熒拈書枕頭睡鼻息春
雷鳴泰山與鴻毛何者爲重輕蹄泓與渤海誰能
較虧盈如能平其心一切當自平

嵩箕有奇姿出雲何悠然雲山足佳處留客今幾
年有子罷讀書求種山閒田栗里愧淵明香山慙
樂天二老已古人相望雲泥懸得酒邀月來對影
空自憐攝衣欲起舞稚子不須牽

喜霽

片段溪雲破縱橫野水淙人閒泥塞路蠅動日烘
窓亂壁苔痕滿侵堦樹影雙還思釀新黍甕面挹

秋江

詩送辛敬之東歸二首

風埃憔悴舊霜袍老去新詩價轉高
橡栗漫山猶可煮不須低首向兒曹

文章無力命有在一點浩然天地閒
風雪滿頭人不識又攜詩稿出西山

修城去

甲戌歲忻城陷官復完治途中聞哀歎聲感而有作

修城去勞復勞途中哀歎聲嗷嗷
幾年備外敵築城恐不高城高慮未固
城外重三壕一鋏復一杵

瀝盡民脂膏脂膏盡猶不辭本期有難
牢護之一朝敵至任推擊外無強援中
不支傾城十萬戶屠滅無移時敵兵
出境已踰月風吹未乾城下血百死
之餘能幾人鞭背馳行補城缺修城
去相對泣一身赴役家無食城根運
土到城頭補城殘缺終何益君不見
得一李勣賢長城莫道世閒無李勣

田閒秋日三首

好雨知時便放晴天和醞釀作西成
秋收但得官

軍飽未怕輸租遠十程

禾穗纍纍豆角稠崧前村落太平秋熙熙多少豐
年意都在農家社案頭

皤翁偃僂負薪行稚子跳梁剝棗聲不似二姑忙
更殺晚春堆髻脫釵荆

客况

廬山踏遍却歸崧世事悠悠付老慵樂近僧居非
佞佛苦無田種強爲農菊花雨似人情冷梨葉霜

如酒力濃一十五秋河表客合教節物笑龍鍾

學稼

不堪炊煮一箱書十口東西若可餽食祿已慙中
隱吏墾山聊作下農夫藁遺場圃無多積子入官
倉困遠輸近日愚軒睡眠少打門時復有追胥

立秋日

况味年來老比丘禪房三伏得遲留連宵雨作垂
垂曉十口家貧盼盼秋熟未先須伺禾黍有無何

暇問衣裳半生枉却親燈火一事不成空白頭

村居夏日

官府不著名散迹村落深白雲自朝莫青山無古
今愛此夏日永門巷多繁陰呼兒具繩牀不履亦
不簪殷勤好風來爲我消煩襟一飽萬事了何用
腰黃金羈勒困名馬網羅多珍禽何如山鹿癡呦
呦戀長林

次韻答裕之

薄莫敲門喜客佳水萍風絮共天涯行藏一話傾
心肺古律三詩淬齒牙朱研不妨閒度日青山終
得共餐霞扶持老病須君輩滿地豺狼萬里家

書懷

嬾退無心廩與庖願攜諸子劬山礲閒消白日醒
吟醉猛省浮生夢幻泡窈窕雲山三兔窟漂搖風
樹一鳩巢聯名便入村家社莫認公卿是故交

寄裕之二首

汨沒兵塵滿鬢霜買鄰心樂古清涼閒陪老秀春
行脚悶欠矐元夜對牀正欲脫身求兔窟誰能隨
世轉羊腸南陽未比嵩陽好滿眼交游卽故鄉
老嬾愚軒百不能飽諳人意冷於冰清狂舊日耽
詩客灰朽而今有髮僧服裹紙衾三丈日話延雪
屋一龕燈新開一逕通蘭若斬盡清涼舊葛藤

丙子夏臥病汗後有作

枯腸得水若通靈渙汗週身一雨零行客筋骸困
方歇醉人心骨喚初醒病蟬移夢入新殼老鶴息
神梳舊翎乞得殘骸對兒女不愁無粟貯陶瓶

宿少林寺

雙輪走雞棲下嶺分閒道行行得精舍翠崦作廻
抱諸峰知客來故故顏色好征衫滿塵土慙愧方
丈老殷勤一瓣香爲我除熱惱世緣如落花籬裊
跡俱埽箇中有佳處行脚恨不早一庵祖師傍異
日親結草

晚出

坐久臥還起畏此夏日長出門髮蓬鬆西日明半
墻鳩鳴舍東柳雌和墻南桑十日暑煩苦一雨方
論量偶然釋憂抱露坐移繩牀羣兒莫相催老子
便晚涼

次韻裕之見寄二首

魚入深淵鶴在陰飛潛何幸遠庖砧乾坤萬里雲
無迹冰雪三冬栢有心故國勾留清夜夢歲華分

副白頭吟莘川擬作桃源隱共與青山閱古今
古屋颼颼四壁塵不堪幽獨足吟呻瓶儲看客常
年慣家具爲農近日新世味飽嘗惟可睡詩情漫
苦不醫貧相從分我西山半欲乞臞元伴老身

題裕之家山圖

繫舟盤盤連石嶺牧馬澄澄倒山影山光水氣相
混涵中有元家舊廬井鴈門一開豺虎場駕言投
迹嵩之陽青山偃蹇不可將十年竟墮兵塵黃東

巖風物知猶在說與寄庵神已會一揮淡墨能似
之清輝遠寄形骸外元家故山吾與鄰夢見不如
畫圖真舊曾行脚聊經眼未得歸時亦可人

早發寶應龍門道中有感

山僧送客客行東迴首雲寮夢寐中人語咿叻村
店火帽簷欹側石門風伊川遠暎春冰綠少頂先
攬曉日紅爲問年來幾還往只應烏鵲識衰翁

欽若遽有商於之行作長語爲別兼簡仲澤

弟一笑

廬山鉅然深可居洛水虬然清可漁嘉哉山水有
如此不能留客如蘧廬楚茅不入干王誅大帥分
闔臨商於謀參帷幄渴英俊蒐羅遠到山閒癯隴
西四欽出將種人愛若也溫而愉竭來誰飛薦鶚
書枕前墮檄催馳驅行參幕賓亦大可把酒當爲
帥君賀王家仲澤如仲宣共看吐奇飛玉唾一軍
號令雅歌中聲落荆蠻膽先破愚軒退居如甌墮

閒暇多君時見過明朝笑語隔關山一月須拚面
墻臥

丁亥三月二十五日雪

夫變乾將至陰凝陽不流雨飛猶帶雪風急似號
秋草木無春意關河慘客愁天心寧易測三歎索
冬裘

大暑

旱雲飛火燎長空白日渾如墮甌中不到廣寒冰

雪窟扇頭能有幾多風

讀樂天無可奈何歌

鳧脰苦太短蚘足何其多物理斬不齊利劍空自
磨老跡富且壽元惡天不訶伯夷豈不仁餓死西
山阿天意寓冥邈人心徒揣摩不如且飲酒流年
副蹉跎酒酣登高原浩歌無奈何

哀古道

山深道壞水縱橫怪得春來少客行不信天教人

迹斷水乾更遣蒺藜生

薛鼎臣罷登封

弄人鼓笛不相疑便著登場傀儡衣終日抱饑唯
飲水也和醉客一時歸

鼎臣材大夫宰登封有惠政今以例罷故有上句

題嵩陽歸隱圖

風烟萬頃一椽茅丘壑端能傲市朝窈窕雲山三
兔穴飄颻風樹一鳩巢本來無取亦無與只合自
漁還自樵三十六峰俱可隱願從君後不須招

御訂全金詩增補中州集卷三十

金元好問原本

馮內翰璧

一十五首

璧字叔獻別字天粹承安二年進士歷州
縣召入翰林再爲曹郎宣宗朝屢以使指
鞫大獄權貴如歸德知府宿州總帥聲勢

焯焯朝廷知其政扈而不能摧伏者叔獻
以法臨之毛髮不貸也幼有重名就所長
論之館閣臺諫與賓客言乃其選也徒以
小心奉法不畏彊禦故屢以城旦書屈之
識者有用違其長之歎與定未以同知集
慶軍節度使事致仕居崧山龍潭者十餘
年諸生從之遊與四方問遺者不絕賦詩
飲酒放浪山水間人望以爲神仙焉山中

多蘭每中春作華山僧野客人持數本詣
公以香韻清絕爲勝少劣則有罰謂之鬪
蘭所釀松醪東坡所謂歎幽姿之獨高者
惟叔獻能盡之客有以京國名酒來與之
校者味殊不能近正如深山草衣木食人
語覺傭兒販夫塵土氣爲不可嚮也是後
松醪鬪蘭遂爲山中故事叔獻少日在太
學賦聲籍甚其學長於春秋詩筆清峻似

其爲人字畫楚楚有魏晉閒風氣雅爲閒
閒公所激賞制誥典麗當代少見其比尺
牘又其專門之學風流蘊籍不減前世宋
景文左丞董公紹祖奉使江左得其詩餞
行喜見顏閒詩四韻每誦一句輒爲一舉
觴李右司之純談笑此世爲不足玩見叔
獻則必爲之懽然王延州從之公於鑒裁
爲海內稱首敬其名德至不敢以同年生

數之北渡還鄉里年七十九終於家

墓碑云所

貴於君子者三曰氣曰量曰品有所克之
謂氣有所受之謂量氣與量備而才行不
與存焉本乎才行氣量而絕出乎才行氣
量之上之謂品品之所在不風岸而峻不
表襮而著不名位而重不耆艾而尊是故
爲天地之美器造物者靳固之不輕以予
人閱百千萬人之衆歷數十百年之久乃
一二見之同乎其時非無孤雋偉傑之士
從容於禮文之域角逐乎功名之地唯其
俗不可以爲雅劣不可以爲勝故自視缺
然陳太丘事業無聞而名重天下房次律
坐鎮雅俗而舉世以王佐許之施之當時
未必適用然千載而下有爲之歛衽者非
品何以得之元光正大以來天下大夫士

論公平生
者蓋如此
子渭字清甫以門資敘仕爲密

院機察清慎而文天下有馮孝子之目今

居鎮陽

同裕之再過會善有懷希顏

寺元魏離宮十日來凡兩前與髯卿借齋奠少林
往其時已薄莫諸勝不暇訪今同魏諸孫再到風
烟上寺僧導升殿雄深肅瞻仰柱礎門限砧追琢
成大壯不見磨琢痕瑩滑明滉朗摩挲三歎息後

世無此匠晚登西南亭碧玉對千丈如王官天柱
如太華仙掌留宿贊公房秀色夢餘想夜靜耿不
眠泉溜琴筑響惜髯今不來聯詩共清賞

和希顏

虎守天門未易通庾塵無扇障西風主人何負盜
憎主公論不明私害公老伏固非千里驥冥飛似
是五噫鴻紛紛往事渠知幾都副崧巔一笑中

送國醫儀師顏企賢得請歸關中次朝賢韻

心平窮富恐欺天面有陰功蓋有年歸去青山仁
者樂祕來丹訣老而傳尚醫冗食渠百輩公論共
推君十全技道精微仍遠引就非輕舉亦幾仙

河山形勝圖

書劍丁年記昔遊中條之麓過蒲州地形西控三
秦遠河勢南吞二華秋晉魏兵爭一春夢漢唐壇
祀幾荒丘披圖弔古今人慨不必重登鶴雀樓

雒帥覓蘭作詩以寄

雲插高牙畫戟新春移寶檻燕堂深水南紅藥初
退舍嵩麓紫蘭今嗣音繭足頰肩坐香累高粱華
棟豈渠心使君有問花應語玉樹誠佳非故林

明皇擊梧桐圖

三郎耳譜趁花奴風調才情信有餘天寶錯來非
一拍霓裳中節亦區區

送人出使

陽春有脚蘇疲瘵水鏡無心照潔汙九道澄清天

意切人才一一似君無

習池醉歸圖

襄漢方屯十萬兵習池日往不曾醒紛紛悞晉皆
渠輩何獨王家一寧馨

東坡海南烹茶圖

講筵分賜密雲龍春夢分明覺亦空地惡九鑽黎
洞火天游兩腋玉川風

陰晦中忽見華山

吏部能開衡嶽雲坡仙曾藉海宮春蓮峯清曉忽
自獻二公何人予何人

草堂春莫橫披

遷客倚樓家萬里五陵飛鞚酒千金草堂澹與春
山對幽鳥一聲春已深

元光閒予在上龍潭每春秋二仲月往往與
元雷游歷嵩少諸藍禪師汴公方事叅訪每
相遇輒揮毫賦詩以道閒適之樂今猶夢寐

見之兒子涓近以公故抵任城禪師附寄詩
以叙疇昔未幾駐錫東菴因造謁閒出示裕
之數詩醉筆縱橫亦畧道嵩遊舊事感歎之
餘漫賦長句二首

性理諸方已徧叅歸來一錫駐東菴山中蓮社舊
招隱旅舍阿戎新對談詩筆如君僧有幾文章媿
我老無堪綾書大字拈香疏須趁微之酒半酣
少林脩竹欲天叅竹外幽閒草結菴顧我雖存惟

白髮與君曾此共立談干戈橫絕境猶夢艸樹荒
殘人豈堪臘甕春醪髯莫預商歌悲壯不能酣

雨後看竝玉所控諸峯

竝玉如高人壁立九千仞一日不見之令人生鄙
吝春深木葉敷秀色益濡潤結茅寄僧藍晴碧時
得趁老宿詫孫峯隅待到齟齬連延青一色枚數
須諦認溟濛空翠閒我亦疑未信朝來雲氣昏埋
沒瑜匿瑾如蒼梧政愁湘妃鬱思舜重陰俄解駁

金鑑詩卷三十一
七
霏澍夕暉襯娟娟忽層出歷歷分遠近雲峯互吞
吐千狀纔一瞬出奇如孫吳相降如廉藺如衆星
拱辰如侯伯入覲接武如朋簪承迎如价儉負固
如吳楚爭長如齊晉怪詭如夷蠻駢羅貢琛贐窘
蹙如擒獲係纍將就釁如應龍神靈蟄臥時奮迅
如天駟超軼垆牧稅羈勒如雄對改容失箸駭疾
震如猛士無譁攢槩俟嚴陣獨兩峯巍然魁傑儼
崇峻光輔嶽柱天鬱爲中興鎮降生申與甫周室
債復振詩傳配崧高百世磨不磷

同希顏怪松

崧高地氣靈花木竟妍秀玉峯西南趾有松獨怪
陋偃蹇如蟠螭奮迅如攫獸葉勁鬚髯張皮古鱗
甲皺菌蠢藤瘦怒支離筇節瘦月上虬影搖風動
雨聲驟子落慰枯禪枝樛礙飛馳盤根萬乘器平
蓋千歲壽樵斤幸免尋厦匠矧肯構龍化會有時
天旱期汝救

宋內翰九嘉

一十一首

補一首

九嘉字飛卿夏津人黃裳榜進士乙科歷
藍田高陵扶風三水四縣令皆有能聲入
爲右警巡使應奉翰林文字正大中病失
音廢居歿於癸巳之禍嘗有詩云浩歌風
露下醉袖拂南山又題壽安烟霞亭云粧
鑿土壁紅千點界畫銀沙綠一鈎其才藻
可畧見矣

補歸潛志宋翰林九嘉字飛卿夏津人少游太學有詞賦聲從屏山游讀書爲文有奇氣與雷希顏李天英相埒也至寧初擢高第歷關中四邑以能稱召補省掾爲當軸者所忌求去已而爲延安帥府所辟充經歷召爲南京右巡院使風采甚著以不能事權要罷官俄入翰林爲應奉得風疾引去遭亂北還道病歿年未五十士大夫

惜之飛卿爲人剛直豪邁不羣能政能文甚爲時望所屬不幸中以病廢哀哉初召至南京時屏山亦在余每從之游亂後余居八仙館與飛卿相邇日相見屬和其詩猶在余橐中文辭簡古法宋祁新唐書惜乎爲吏事所奪不多著性不喜佛雖從屏山游常與辯爭在關中時因楊煥然赴舉書與屏山薦之曰煥然佳士往見吾兄慎

無以佛老嫚之也屏山持之示交游以爲
笑其後西行余以序送之備論其守道不
回今茲云亾豈復見此挺特之士乎

途中書事三首

幼穉扶輪婦挽轅連顛翁媪抱諸孫饑民羸卒如
流水掘盡原頭野薺根
老穉扶攜訪熟鄉驛塵滿路瑾相望終朝拾穗不
盈把只有流民如麥芒

攘絲奪麥人爭畧烘日吹風天有年湯餅元非小
人腹繭絲都作大夫賢

館中納涼書事

涼灑塵纓聒耳醒虛堂窈渺好風清雀知愛子來
迴哺鼠不畏人旁午行每用熟眠酬閒寂端知固
有享高明宦遊非不佳官府奔走塵勞漫一生

東州有感

東城衰艸沒黃沙故壘周遭小范衙牧豎那知真

老子龜趺繫馬臥吹笳

搗金明砦作建除體

建牙誓諸將梟鳴軍盡驚除道非戰事銜枚幻奇
兵滿鎧霜日輝行陣寂無聲平日飛出谷桑棗蔽
金明定知此陳迹中原遮寇城執鞭吾不及范公
凜如生破碑字仍在屭鬣臥深荆危襟按其壘信
哉天下英成敗翻覆手狐兔今橫行收復會有時
夷吾當請纓開圖睨督亢按劍逐長鯨閉塞亦已

久一揮氛曠清

被檄從事

不巾不襪柳陰行朝醉南村莫北莊一旦捉將官

裏去直驅盲馬陣中央

卽所乘盲馬而言

留別孫俊民姚公茂

艸根殘日射離觴主席風生熱肺腸此去兜零紅
照夜輸君吹笛傍糟牀

酴醿菊

全金言卷三十一
三
醪醑風味醺人醉著莫東籬愛酒翁一夜金英全
換骨冷香晴雪滿秋風

蓮社圖

野鶩家雞俗好乖虎溪泉石滿塵埃壯哉砥柱頽

波裏惟有淵明挽不來

飛卿不喜佛法自言平生有三恨一恨佛老之說不

出於孔氏前二恨辭學之士多好譯經潤文三恨大才而攻異端淵明挽不來之句蓋自况也

卯酒

臘蟻初浮社甕篳宿醒正渴卯時投醉鄉兀兀陶

陶裏底事形骸底事愁

題李白泛月圖

江心月影盡一掬船頭月影盡一吸夜涼風露點
宮袍天地之間一李白

李右司獻能 二十首

獻能字欽叔河中人年二十一以省元賜
第廷試第一人宏詞優等授應奉翰林文
字在翰苑凡十年出爲鄜州觀察判官用
薦者復應奉俄遷脩撰以鎮南軍節度副
使克河中經歷正大八年河中陷獨得一
船走陝州被召以道梗不能赴就權陝府
行省左右司郎中軍變遇禍欽叔資稟明

敏博聞強記輩流中少見其比爲人誠實
樂易洞見肺腑世閒狡獪變詐纖悉無不
知然羞之爲不道也與人交不立崖岸杯
酒相然諾赴難解紛不自顧惜雖小書生
以愛兄之道來亦殷勤接納傾筐倒庋無
復餘地時輩以此歸之家故饒財盡於貞
祐之亂京師冷官食貧口衆無以自資太
夫人素豪侈厚於自奉小不如意則有金

魚墮地之譴人視之殆不堪其憂而欽叔
處之自若也欽叔文章行業過人處甚多
而天下獨以其純孝爲不可及云

補歸潛志李獻能欽叔河中人先世以武
功顯仕至金吾衛上將軍時號李金吾家
欽叔昆弟皆以文學有名從兄欽止獻卿
先擢第繼以欽叔又繼以從兄欽若獻誠
從弟欽用獻甫故李氏有四桂堂欽叔苦

學博覽無不通尤長於四六南渡擢南省
魁後中宏詞遂入翰林爲應奉考滿再留
出爲鄜州觀察判官再入遷脩撰正大末
授河中帥府經歷官北兵來攻軍敗奔陝
又爲陝府經歷官天興改元陝亂見殺年
四十三欽叔爲人眇小而黑色頗有髯善
談論每敷說今古聲鏗亮可聽作詩有志
於風雅又刻意樂章在翰院應機敏捷號

得體趙閒閒李屏山嘗曰李欽叔天生今
世翰院材故諸公薦之不令出館嘗謂人
云吾幼夢官至五品壽不至五十後竟如
其言異哉

贈王飛伯雜言一首

東風吹客衣敗絮逐風飛曉雪沒寒薺無物克朝
饑空簞嘖嘖號饑鼠饕蝨蠕蠕緣破袴人生豈是
犬與雞終歲區區守門戶游說萬乘苦不早儀秦

殆是穿窬盜六國印千金車滿眼榮華鏡中老孔
子聘列國孟軻游齊梁能令千載後名與日月光
男兒生世不虛生歟恨身後無聲名不然鳴玉遊
紫京不然著書談六經九日可射天可補鞭笞百
蠻作降虜離騷一篇亦不惡雄筆盤盤映千古君
不見彩鳳翔丹霄一鳴應九韶寸雲起泰山霖雨
滿人間丈夫窮達果在天安用兒女得志相歆羨
失志相悲憐仰天大笑出門去四海今誰魯仲連

夜宿虛皇閣下

倚天青壁截雲霞一水高懸界削瓜不惜矜竦攀
石磴要看絢爛坼雲華玉峯影裏虛皇閣鐵笛聲
中祕監家明日川塗入塵土却應平地幾裛斜
玉華谷同希顏裕之分韻得秋字

玉龍落峽噴飛流空翠霏霏晚不收軟脚山堂一
壺酒莫涼閒對兩峯秋

四皓圖

弋繒安足致冥鴻自是兼懷翊贊功
謾說壺關有遺老望思臺上已秋風

二老雪行圖二首

自笑膠膠擾擾身十年匹馬走紅塵
何時雪滿平生屐太華峯前約故人

抱琴衝雪又衝風二老風流阿睹中
未似村翁眇抹眼火爐頭上話年豐

別馮駕之

東風弄微寒吹雪作輕陰春歸未得歸
愁攬客子心與君俱異縣那復重分襟
感時復恨別老懷苦難任憶昨滎陽會
燈火語夜深縱談閒俳語浩歌雜狂吟
相欺梁宋游感君肯相尋西園偶差池
市樓成孤斟相逢洧水湄暫爾成盍簪
燕鴻還別去又復如商參我行落日邊
匹馬獨登臨君方無定在倦翼思茂林
人堪幾回別老境各駸駸洧水不西流
雙魚定沉沉幸有西飛鴻無吝金玉音

昆陽元夜南寺小集

春臯短短生蘭芽東風嫋嫋吹芳華暗黃著柳小
梅素月姊新年恰十五東皇太一來翩翩竹官神
光祀甘泉茂陵弓劍沒秋草鳳燈煌煌空自然當
年曼衍魚龍舞回頭昭陽化飛土昆陽客舍冷於
冰破殿蕭條佛燈古雪消梁苑想春紅車如流水
馬游龍銀餅載酒隨春風酒酣一嚼百杯空韶華
過眼弦上箭人生得酒從歡醺北斗闌干夜參半

耿耿疎星淡河漢

追憶潁亭汎舟寄陽翟諸友

十月冬氣寒清霜殞羣木輕舟汎潁水微風吹野
服信流不知還石艇橫老玉苔花錦爛斑懸溜珠
麗穀頗離廛市雜倒瀉軒裳俗歲月今幾何春草
萋以綠懷歸劇饑渴仰羨雙飛鵠矯首九山雲迢
迢傷遠目

邾城秋夜懷李仁卿

日入羣動息暝色陰濛濛故人隔潁水嫋嫋生秋
風輕風捲纖雲碧漢磨青銅坐久襟袖涼皎月升
天東伊人如此月霽色羅心胸可望不可親倏已
駕飛鴻念此太虛閒心交神自通而况千里月相
望寧不同孤光透薄帷儼如接音容翻翻繞枝鵲
唧唧侵堦蛩上牀轉不寐高樓待晨鐘相思夜何
永月落秋牀空

題飛伯詩囊飛伯以布爲囊采當世名卿詩

投其中

潁露毛錐祗自賢智如樗腹但求全迂疎差似淵
才富羞澀猶無杜老錢收拾珠璣三萬斛貯儲風
月一千篇嘔心大勝奚奴錦要與風人被管絃

送王飛伯歸陽翟

故舊相望似曉星平生懷抱向君傾朱絲不入秦
箏耳彩鳳終儀韶濩聲三楚迢迢動離思九山落
落助高情一屨擬就隆中臥要子同躬壠上耕

西園春日

的皜冰梢出短墻泓澄暖綠靜橫塘娟娟高竹迎
人翠嫋嫋長紅隔水香病起心情疎酒酸朝來風
色妬年芳只應歸去雲窻晚夢到湘妃錦瑟傍

滎陽古城登覽寄裕之

突兀高臺上古城登臨人境兩崢嶸關河落日歲
云莫草木臨風氣未平虎擲龍拏王伯事天荒地
老古今情一盃欲洗興亡恨爲喚窮途阮步兵

從獵口號四首

蓮燭金紗簇簇齊宮槐籠曉尚凄迷景陽鐘罷聽
殘漏萬馬銜霜不敢嘶

聞闔傳符啓九關一聲清蹕駐南山虎賁先導三
千士天馬初離十二閑

爛爛龍旂捧日旂從臣遙認赭紅衣天王清曉親
弧矢初合今冬第一圍

的皜金鑰墮曉星晴天霹靂應弦聲風毛雨血燕

雲在未要草間狐兔驚

上清宮梅同座主閒閒公賦

厭住盧家白玉堂
琳宮瀟灑占年芳
光生琪樹風霜古
影占銀潢月露涼
物外根株本仙種
世閒紅紫避嚴粧
遨頭詞伯今何遜
一笑詩成字字香

丹陽觀竹宮中移賜

素士如林侍紫青
紫青新許任蓬瀛
娟娟粉節霜勻出
蠹蠹烟梢玉削成
福地根莖蒙化育
中天雨

露藉恩榮綠章封事朝來奏
又聽風前彩鳳鳴

全金言卷三十一

三十一

談論工書法妙於琴事詩其專門之學人
物楚楚若素宦於朝吏事則與冀京父相
上下其辨博又屏山所許天下談士三人
之一也嘗與予行內鄉山中馬上賦詩云
霜風十月餘千山錦崢嶸又九日登潁水
見寄云茫茫襄城野歲晏多風埃野田半
已荒草蟲鳴更哀西風吹白雲大隗安在
哉七聖之所迷而我胡爲來我本林野人

初無經世材失身鞍馬閒坐令雙鬢催安
得元紫芝共舉重陽杯詩成西北望九山
鬱崔嵬此詩脫遺處不復能記憶讀之尚
可以見斯人胸懷之髣髴仲澤頴上詩不
才被棄翻爲福
拙計無營却似高是處青山可埋骨誰家
白酒不消憂夕陽轉屋挂林影急雨壞橋
喧水聲人
喜傳之

補歸潛志王渥仲澤後名仲澤太原人家
世貴顯少游太學有詞賦聲屢中高選南

渡後擢第爲時帥粵屯邦獻完顏斜烈所
知故多在兵閒後辟令寧陵有治迹召爲
省掾因使宋至揚州應對華敏宋人重之
回爲太學助教充樞密院經歷官俄遷右
司都事稍見信用天興改元從赤盞合喜
提兵出援武仙鄭州西遇北兵大戰歿於
陣性明俊不羈博學無所不通長於談論
使人聽之忘倦工尺牘字畫適美有晉人

風作詩多有佳句其贈李道人云簿領沉
迷嫌我俗雲山放浪覺君賢又潁川西湖
云破除北客三年恨慚愧西湖五月春又
過龍門云詩成一大笑浩浩洪波東

潁亭

三載西湖阻勝遊潁亭聊喜散羈愁九山西絡烟
霞去一水南吞澗壑流賓主唱酬空翠琰于戈橫
絕自滄洲忽忽匹馬從軍去慚愧烟波萬里鷗

有寄

十年鐵馬暗京華客子飄零處處家征鴈久疎河
朔信小梅重見汝南花棲棲活計依簷雀冉冉年
光赴壑蛇舊雨故人應念我不來聯句夜煎茶

寄京父

憶昔相從在寢丘城南城北縱歡遊杏花聯句香
隨馬野水添杯浪拍舟邂逅又成三月別飄零合
負一春愁汝陽淮甸經行徧應有新詩爲我留

餐秀軒

秋風幾日搖霜樾秋色南山兩奇絕野人窓戶終
日開要看千秋秦嶺雪層崖深谷相吐吞落日白
鹿東南奔野花雙堦古蘭若樓觀縹緲煙霞昏玉
山生玉人不識草木四時空好色輞川舊與藍橋
通細水至今流石室一川黃葉長安秋望望不見
令人愁書生不是濟時具收得閒身成此遊主人
開筵留客醉山雨多情濕征袂明朝騎馬上七盤

回首山家但空翠

遊藍田

甲申之秋月建戌我行商嶺正落木山英似與行
子期撥霧披雲到山腹古潭千丈照錦峰下有蟄
龍上棲鶴高風吹雪已多時熊耳雙尖寒欲縮新
乘一水出龍渦驚見千峰遮木榭南山秀拔北山
雄劍戟森然對羣玉崎嶇直過藍田西始見商山
真面目悟真峽口忽中斷天未脩眉畫濃綠此峽

何年得此名曾有金仙構華屋西巖石室懸細水
萬斛瓊珠輸輞谷行人尚說有七盤瘦馬已愁疲
百曲風門放眼望秦川擾擾更嗟塵界跼去年游
騎渡葭蘆萬里橫行如鬼速灞陵原下馬飲血太
華峰頭虎擇肉今年九月未防秋始見登場有新
穀一鞭莫指古招提疎雨有情留客宿主人聞客
喜相接罇酒笑談如昔夙蹇予懶散本真性臨水
登山此生足一行作吏志益違十載從軍雙鬢禿

官家後日鑄五兵便擬買牛耕白鹿

送裕之還嵩山

高懷不受簿書侵清潁鷗盟欲重尋老去宦情知
我薄閒來道念見君深對牀夜雨他年夢滿馬西
風此日心嵩頂勝遊誰得共仙聞仙馭待知音

用古仙人詩語

古仙人辭今附于此

夢入雲山宮闕幽鸞鷲同侶鴛鳳流桂月竟夜

光不收世俗擾擾成囂秋醉飛星馭鞭金虬八
仙浪迹追真游龜玉筌蹄二十秋摩霄注壑須
人求覓劍如或笑刻舟陽燧非無角綺儔元鼎
以來虛崑丘東井徒勞冠帶脩松食竹飲度蜃
樓崧頂坐嘯垂直鈎祗應慚愧劉幽州

知音者無惜留

跡
興定庚辰夏六月望予與元好問趙郡李
獻能同遊玉華谷又將歷崧前諸刹因憩
於少姨廟元周行廊廡得古仙人詞於壁

閒然其首章直屋漏雨爲所漫剝殆不可
辨乃磴木石而上拂拭汛滌迫視者久之
始可完讀觀其體則柏梁事則終始二漢
字畫在鍾王之間東井又元鼎所都幽州
必賢宗子虞也夫眷眷不忘幽州者非吾
田疇尚誰歟田復所事之讐却曹瞞之賞
衰俗波蕩中挺挺有烈丈夫風氣其歿而
不忘蓋無疑其能道此語亦無疑觀者不

金言卷三十一
應以文體古今之變而疑仙語也噫仙山
靈嶽宜有閎衍博大之真人往來乎其間
而世人莫之識也予三人者乃今見之夫
豈偶然哉再拜留跡以附知音者末渾源
雷淵題此詩爲仙語無疑然直謂田疇則
似亦未安屏山李純甫題

遊丹霞下院同裕之鼎玉分得留字

霜落豐山白水收歲華全在竹園頭賦詩鞍馬慚

真賞載酒林泉阻勝遊野色自隨人意遠夕陽應
爲鳥聲留仙源回首旌旗隔一笛西風喚客愁

丹霞

下寺土人以
竹園頭名之

驛口橋看白蓮

陰陰喬木障晴暉的的冰渠照碧漪秋暑困人仍
御扇晚風生竹却添衣百年蓬鬢關心切千里蓴
羹與願違杖屨頻來約他日不妨先築釣魚磯

蒙城縣齋

穀雨連朝沒麥場官糧未久長官忙堦庭有雨青
蛙鬧牢戶無人白日長

三門津

層崖摩蒼穹四月號陰風大河三門險神禹萬世
功他山亦崔嵬砥柱獨尊雄雷霆日鬪擊悍暴愁
天公劉侯智有餘始令舟楫通仍餘石上穴飛棧
會連空遙瞻白玉枝挺直丹竈中仙公去不返此
事真冥蒙夫人與鼓崖怪幻尤難窮獨喜兵火餘
巋然出新宮當時疏鑿意四海要會同誰知千歲
後築壘防嘯兇詩成一大笑浩浩洪波東

被檄再至揚州制司驛亭有題詩譏予和事
不成者云來往二年無一事青山也解笑行
人因爲解嘲

二年奔走道途閒知被青山笑往還只向江南南
岸老行人應更笑青山

開福寺

翠林深處欵招提冉冉春風入鼓鞞雲獻好山青
入坐雨添新漲綠平堤樹頭樹底見花發山後山
前聞鳥啼踏月歸來聞好語兒童爭唱白銅鞮

冀都事禹錫 二首 補一首

禹錫字京父龍山人崇慶二年進士調洮
丘簿與縣令者不相能及令以贓敗疑京
父發之乃賂遺權貴誣京父以賓客依託
之事坐廢十年朝臣薦其才者積十數人
終為銓曹所礙居襄邑部使者起之攝宥
近諸縣所至有父母之愛農司治許昌又
為主事區處餽餉上下千餘里不露聲迹

而條畫次第皆具雖鱗雜米鹽若不足經
意者問之卽應如指諸掌一時吏如康伯
祿李欽止諸人多自以爲不及也正大中
當路諸公極力辨其被誣乃得以常調守
扶風丞召補省掾不就歸德奏克知事及
城被攻京父爲經歷官守禦之策一府倚
重之車駕至授左右司都事兼應奉翰林
文字官奴之變家人勸京父羸服免禍不

從人有自外至者京父問賊入禁中否曰
禁中賊滿矣乃自投水中在京師時希顏
仲澤欽叔京父相得甚歡升堂拜親有昆
弟之義而不肖徒以文字之故得幸諸公
閒希長予六歲澤長四歲欽與京少予二
歲希沒於正大辛卯之八月年四十八澤
沒於明年之七月年四十七欽沒於其年
十一月年四十一歲京沒於又明年之三

月年四十二蓋不二三年而五人者惟不
肖在耳今日錄諸君子詩感念平昔不覺
流涕之被面也

補歸潛志冀禹錫京父惠州龍山人幼聰
敏絕倫年十九擢大興魁入太學有聲弱
冠登高第時雷希顏宋飛卿皆同榜號爲
得人京父入仕以能稱遇事風生老吏莫
及初主洮丘簿以年少喜交遊飲酒遂爲

其令所乘坐廢再調考柘二城皆主簿又
以治聞由前過終不得京官朝士屢薦之
爲當途者所沮居閒日與諸公宴遊蒙昭
雪得扶風丞因客睢陽爲行樞密院辟爲
都事末帝東遷擢爲應奉翰林文字克尚
書省都事蒲察官奴之變與宰相李蹊同
見殺年四十三京父少年作詩鍛鍊甚工
寫畫亦勁健可喜其贈先子詩有云忠策

萬言憂國獻好詩千首課兒抄又哭先子
云大才自古無高位吾道何人主後盟又
醉鄉廣大寬留地仕路崎嶇小作程散文
亦精緻嘗作余先子哀詞雷丈希顏善之

僧房

上方樓觀袂衣寒霜後川原眼界寬我是禪房未
歸客阿師休作長官看

贈雷御史兼及松菴馮丈

平生疾惡如風手力振臺綱事所難人道千鈞羞
射鼠我憐衆煦解漂山明時士論知無負晚歲交
盟豈易寒見說嵩前茹芝老白雲倚杖待君還

聞誅高琪詔下寄聶元吉

開函喜讀故人書四海窮愁一豁無見說帝廷能
殛鯀逆知天意欲亾吳兩宮日月開明詔萬國衣
冠入坦途莫向新亭更垂淚中興豈止一夷吾

蘭泉張建

二十三首

建字吉甫蒲城人明昌初舉才行授絳州
教官召爲宮教應奉翰林文字以老乞身
道陵愛其淳素不欲令去左右眷眷久之
超同知華州防禦使事仍賜詩有從今晝
錦蓮峰下三樂休誇榮啓期之句士林榮
之吉甫自號蘭泉老人有集行於世其論
詩云作詩不論長篇短韻須要詞理具足

不欠不餘如荷上灑水散爲露珠大者如
豆小者如粟細者如塵一一看之無不圓
成始爲盡善吉甫詩雖不能盡如所言然
亦未爲無所得也

擬古十首

飛雲何冉冉高與日月齊中有兩仙人盛服持玉
圭我欲從之游天險不可躋邈焉望不及短日西

山西

客從嶽頂來貽我松粉黃爲言服之久身輕欲飛
翔我嘗淡無味我嗅寂無香還君三太息世好方
膏梁

枯桑依頽垣摧折生理微剝我枝閒葉備君身上
衣葉盡誰復顧棲鳥亦來稀君看牡丹叢日日笙
歌圍

青青河濱柳柯葉柔且妍一從智巧萌戕賊爲枯
樵器成豈不佳天質失自然爭如河堤上濯濯披

春烟

石泉何清冷中有九節蒲蒲性本孤潔不受滓穢
汗一移入城市生意寄泥淤翠葉日焦卷不霜而
自枯寄言守靜者勿涉奔競途

庭前蘭蕙窠三年種不成門外旱蒺藜一旦還自
生第恐傷我足鋤去根與萌如何一雨後走蔓復
縱橫

有客曳長裾袖刺謁高閎低頭拜闥者始得通姓
名主人果厚眷開宴海陸并顧必承彼顏語必順
彼情不如茅簷下飽我藜藿羹

拳拳嶧山桐一樹十二枝枝分十二律所指各不
移胡爲師襄子獨謂東南奇一律不可闕一枝不
可遺誰能以此意說似典樂夔

美人何熒熒顏若苕之英絕世而獨立一顧傾人
城三星正當戶似我亦在庭之子無良媒不敢犯
露行

丘中有一士顏貌清且癯緼袍僅蔽體蔬飯不滿
盂時出蓬蓽門鼓腹歌黃虞不知何所得矯首望
八區

山中

林櫻墮紅珠打著琴上絃山人時一笑愛此聲琅
然

韓信廟

一檄風馳萬壘降當時意趣已難量既能歸漢識

真主何必下齊求假王將幄深巖巖樹碧門旌搖
曳嶺雲黃我詩責備春秋法勝把君侯美處揚

送張子玉

渭水玻璃碧秦山劍戟明秋光如我瘦行色與君
清蟬嘒西風柳鴉翻落日城歸舟幸無物且莫苦
貪程

梨花

蠹樹枝高茁朶稠嫩苞開破雪槎球碎粘粉紫鬚

齊吐潤卷丹黃葉半抽月影曉窓留好夢雨聲深

院鎖清愁瓊胞已實香猶在散入長安賣酒樓

長安

酒家有
梨花樓

答華陰宋先覺

雲臺清進憶當年詩筆逢君厭老拳後會邈如千里遠壯懷不似十年前風帘搖曳橋南酒烟樹溟濛渭北天咫尺靈山飛不到夢魂長遶玉峰蓮

送賀彥淳還南邠

得

俊師定菴

○
渟泓石上泉照我良是我輕風一蕩激真態互掀
簸乃知求慧性非戒定未可道人此名菴付千劫副
一坐海月自澄明天花任飛妥吾生劇萍梗萬里
信漂墮湛然摩尼珠坐受昏塵累何時陪遠公同
社事香火

送王主簿還鄉

笑君習氣只書生薄有歸衰亦自清瘦僕擔詩雙
籠重羸牛引輓一車輕長亭已過那知遠別酒猶
多未忍傾記取明年斷腸處玉梨花底月三更

蘇東坡詩集卷三十一

張瓚 一首

瓚字器之河中人才氣超邁時輩少見其
比年未二十以鄉試魁陝西河東不幸早
逝張吉甫弔之云惜哉器之真丈夫少年
讀徧天下書一事不成歿於途苗而不秀
有矣夫秀而不實有矣夫其爲名流所嗟
惜如此

遊棲巖寺

林表招人白塔明竹閒蘭芷石泉清惠崇水墨西
軒景烟帶平蕪水帶城

毛宮教麾

七首

麾字牧達平陽人大定十六年舉學行特
賜進士出身授校書郎入教宮掖歷太常
博士終於同知沁州軍州事有平水集行
於世

無題

小顰對起石州山楊柳分青入髻鬟乍識春風眼
如鶻爲誰無語獨凭闌

遊河西孫氏園

亭榭依山水亂鳴已如罨畫障中行
照溪芳樹紅雲合迎客幽禽翠羽輕
豪氣未饒金谷友醉魂如到錦官城
猶慚歸騎匆匆去不得持杯待月明

魏城馬南瑞以異香見貽且索詩爲賦二首

梅心蘭甲類元同氣壓荀家百和功
藉潤更煩纖手玉出雲初試博山銅
崇朝日下亭亭蓋三月花閒細細風
我有因緣在香火鼻端消息爲君通

二卉真香豈復加便宜編譜入雄誇
留殘一點薺薇水幻出諸天蒼荀花佩帶正垂金
鈿小薰爐孤起翠雲斜金籠甲帳豪華事
慚愧桑樞甕牖家

新春雪與韓府推

春到千門氣自嘉更教飛雪助年華
六街官柳枝枝絮一夜江梅樹樹花
况是縱吟多伴侶直須爛醉作生涯
埽庭迎客東風裏幕府風流有故家

和思達兄杏花

碎剪明霞役化工
曉園香散暖烟中
羞逢柳眼三
眠白分得桃腮一笑紅
上苑繁華迷故國
曲江顛
顛老春風欲傳此恨
花無語強對芳時作醉翁

春賞

潤入梅天雨乍晴
喚回春意有新鶯
雲霞照眼青
山近羅綺吹香白
晝明翠勺銀罌沽酒市
暖風遲
日賣花聲人人共喜華胥世
何用遨頭羨錦城

朱宮教瀾

三首

瀾字巨觀霖堂先生之子
學問該洽能世
其家大定二十八年進士
時年已六十意
氣不少衰歷諸王文學
應奉翰林文字終
於待制党趙推挽之力
爲多以嘗入教宮
掖故集中多宮詞

寒食不出

地偏無客過吾廬
寒食清明入燕居
驥子捧甌仍

蠟茗孟光舉案只春蔬蠅沾香篆渾傷字蜂蹙瓶
花半墮書習氣未除還自笑却將佳節副三餘

黃筌雀蝶

飢雀喧爭蛺蝶孤錦官城闕見丘墟老筌妙意誰
知解丹粉圖中有諫書

宮詞

太一芙蓉上下天秋波澹澹白生烟採蓮宮女分
花了笑把蘭篙學刺船

御訂全金詩增補中州集卷三十二

金元好問原本

姑汾漫士王琢 六首

琢字器之平陽人與毛牧達同時相友善
天性孝友爲鄉里所稱酷嗜讀書往往手
自鈔寫家素貧乏而能以剛介自持未嘗

有所丐貸時命不偶年四十五以病卒士
論惜之有姑汾漫士集行於世所著中聖
人賦今世少有能到者詩好押強韻務以
馳騁爲工七月十五夜看月云歷樹有驚
鵲悄鄰無吠厖對雨云春雨薄如夢曉雲
閒似愁秋霖云窓寒知氣重人靜覺泥深
驟雨云雹點撒冰彈電光飛火繩春陰云
庭澹梨花月樓寒燕子風久雨云練挂遮

簷直麻懸到地齊此類甚多

附元好問十七史蒙求序安平李瀚撰蒙
求二千餘言李華作序李良薦於朝蓋在
當時已甚重之迄今數百年之間孩幼入
學人挾此冊少長則遂講授之宋王逢原
復有十七史蒙求與李瀚並傳及詩家以
次韻相夸尚以蒙求韻語也故姑汾王琢
又有次韻蒙求出焉評者謂次韻是近世

人之做以志之所之而求合他人律度遷
就傅會何所不有唯施之賦物詠史舉古
人徵事之例遷就傅會或當聽其然是則
韻語次韻爲有據矣

元夜雪

寶燈樓閣澹連雲轉眄俄驚糝玉塵遊伎行歌俱
失意蔬畦麥壠自知春良宵不肯平平過造物應
誇着着新獨有中天端正月一樽梅影屬閒人

和張仲宗雪詩不用體物諸字

天人應十歲出此當佳占舞巧穿幽隙堆寒壓短
檐閒門誰擁篲醉館自開簾比興非無物詩人正
避嫌

同漕使趙中憲對雪

投隙穿窗苦見侵向無湘耐若爲禁花多不入貧
家眼歲好方知造化心躍馬共思追兔跡抱戈誰
與置羊斟新詩與雪爭奇峭擁褐空齋得細吟

又

詩南華夢好初飛蝶闥苑春閒又落花似勝前詩恨終篇不能完好耳

癸酉歲大熱

似動不動雲蒸空欲雨未雨天無風時時日脚蹴
雲破一射萬土紅爐中織絺挂體劇重鎧大屋僅
可爲樊籠積冰爲丘坐自潰輕箠况得微涼通山
林亦聞有暍死城市偏側宜無容吾生於熱亦屢
度此熱盡可并前鎔雖然一氣播常令頓作駭異
疑非公曾聞天南有祝融出入毒霧騎雙龍自從

鼎去昧神怪無乃煽處行心胸手搖斗柄酌炎海
力逐燂怒乘離宮喜爲鬱蒸怒爲火流爍金石乾
河洪熾昌自欲弄朱夏驕蹇未肯官炎農霞烟灼
灼燥昏曉鳥獸喘喘茫西東此而不制滿三伏遂
恐百物隨枯蓬太白之兵攢萬峰銀河之浪滔無
窮可洗虐焰夷姦凶我欲呼愬煩神功耿耿九虎
天關重

辛未九月二十一日雪

幾日西郊霧連宵北牖風菊花猶汎酒雪片忽填
空草樹秋容失河關曉氣濛聽初疑落葉仰不辨
高鴻爛熳三冬意憑陵百圃功披裘赴雞黍埽徑
惜籬叢豈料立英巧來爭白帝雄剪裁渾草草飛
舞太怱怱祗作干時令非關兆歲豐冬雷怪相似
春雹冷應同安得蛟龍蟄何由翳靄通日華姓赤
壁天色湛青銅尚有登臨興寧無賦詠工烟霞狂
坐嘯一發醉顏紅

雨夕感寓

漠漠初燈後森森細點飄繁聲入遙夜冷簟悅秋
宵起欲吟相和吁無客可招何曾洗兵馬但覺漏
薪蕘雷電初無預炎蒸遂不驕瀉檐鏘未歇欹枕
兀無聊澗已山輪潦堤應水沒橋長林倦今夕孤
鳥撼驚條似我纏憂戚因貧墮寂寥避人猶虺蜴
擇宿等鷓鷯共世難曹禰無才匹管蕭苦心還自
笑末俗本多囂未老愁摧鬢長饑帶臄腰牀寒少

陵被飲陋子淵瓢射策初游漢潛山敢傲堯鹽車
竟垂耳風鷁忌干霄一室元空埽千鍾豈易要芳
蘭逼憔悴尺鷁失逍遙字對諸生識詩煩衆手瑀
搜求勞腎胃戛擊謝咸韶舊弄新絃掩窮途拙目
搖爭爲壯夫篆只使古風澆血指甘時巧包羞愴
道消優游能卒歲三四儘論朝故慢幽霖透長檠
暗燼挑不辭牆出茵儻見穀抽苗饜飫貪夫腹翻
騰樂歲謠晴樓交燕雀涼樹沸蟬蛭坐快虹蜺出
憂無萍梗漂浩歌彌激烈興在海門潮

呂中孚 九首

中孚字信臣冀州南宮人孝友純至迄今
爲鄉人所稱累舉不第以詩文自娛有清
漳集行於世其賦紅葉云張園多古木蕭
寺半斜陽先君子甚愛之

小景

青蕪平野四圍山山郭依依紫翠間村遠路長人
去少一竿斜日酒旗閒

春月

柳塘漠漠暗啼鴉一鏡晴飛玉有華好是夜闌人不寐半庭寒影在梨花

水聲

長陂千頃碧淙淙浪卷秋風過石砭記得夜來愁聽處一燈明滅照寒窓

雪

隨風拂拂玉花飄入夜寒窓更寂寥爐火已殘燈

未燼一簾疎竹白蕭蕭

送李嘉甫信都令耘甫之弟

溪水碧於草溪邊送客行寫詩傳別意把酒聽歌聲去路青天遠歸心白羽輕樽前折楊柳一一是離情

寫懷

秦川西去遠不意過漳川歸夢三千里羈愁二十年謀生空白髮行路若青天餘事休相問相留只

醉眠

梨花

等待清明得得芳團枝晴雪暖生香洗粧自有風
流態却笑紅深睡海棠

集句

騷人吟罷起鄉愁百感中來不自由一種人間太
平日滿衣塵土避公侯

柳

風外絲絲裊綠烟輕花初破不成綿却嫌官路逢
寒食惱亂離愁似去年

王元節 三首

元節字子元弘州人祖山甫遼戶部侍郎
父詡海陵朝左司員外郎子元壻於南山
翁傳其賦學第進士雅尚氣節不能從俗
俯仰故仕不達既罷密州觀察判官卽閒
居鄉里以詩酒自娛號遯齋老人年五十
餘卒弟元德亦第進士有能名於時終於
南京路提刑使

青塚

環珮魂歸青塚月
琵琶聲斷黑山秋
漢家多少征西將
泉下相逢也合羞

與党世傑軍判丁亭會飲

望斷西州萬里家
又將新火試新茶
青油幕下成何事
兩見常山山杏花

古鎮道中

秀拔諸峰鎮海墩
海天水氣兩昏昏
鷗飛翠竹白

沙地人宿黃魚紫蟹村
向背雲山行處路
淺深潮浦漲來痕
同游幸有能詩客
不倦躋攀到石門

李端甫

一首

端甫字濟夫同州人第進士

三王內恕及人榜

仕

為平定州軍事判官工於詩有虎迹未乾

溪水近樵聲相答嶺雲深之句子實字師

白死於壬辰之亂

太白扇頭

巖冰澗雪謫仙才碧海騎鯨望不回今日霜紈見
遺像飄然疑自月中來

楊澤州庭秀

二首

補一首

庭秀字德懋華州人大定中進士學詩於
蘭泉張吉甫有渴心曉夢江湖濶醉眼春
風草木低之句泰和三年刺澤州致仕後
閒居鄉里坐爲楊珪註誤被法士論冤惜
之

成臯道中

瘦馬成臯道阻長崢嶸冰雪老年光九關欲上虎

豹怒三逕未歸松菊荒嵩少雲烟聊駐馬漢唐宮
殿兩亡羊鄭南嶺下梅花發千里相思空斷腸

李簡之蓮池集句

一月衰顏幾笑開生前相遇且銜杯蓮塘十里花
如錦有底忙時不肯來

松嶺謁衛公祠

深居太行巔繞郭山如帶西南古松嶺傑出羣峰
外巉巖聳熊耳隱隱負鼇背小樓不垂簾倚欄日

相對春風遇休沐浴累謝機械寸心渴登臨老氣
鼓衰憊陰崖冰磴滑凌澗鳥道隘瘦籐盤絕頂清
境豁眼界衛公廟貌存英氣凜如在法輪靈迹古
殿閣啓綵繪祖燈相繼續劫火不可壞盤亭接天
壇胸次何芥蒂蒼流會清泚緣絡分枝派翠巒臥
浮雲幽壑產珍怪松風噓笙磬巖溜響環珮此來
真勝遊所適了無礙不作白頭吟且償行脚債可
喚千金兒漫寫垂堂戒

孫省元鎮一首

鎮字安常絳州人高才博學嘗中省試魁
承安二年五赴廷試賜第以陝令致仕年
八十四卒有注東坡樂府歷代登科記行
於世弟寧州刺史錡字安世潘原令鉉字
安道同榜擢第鄉人榮之號三桂孫氏安
常孫詵思美軍府叅佐安世孫處謙志全
安道孫蔚今俱在

許氏雙桂堂

許家二桂聯翩秀
孫氏三枝次第春
盛事若將相比
竝輸君堂上拜雙親

張著

二首

補一首

著字仲揚永安人泰和五年以詩名召見
應制稱旨特恩授監御府詩畫

九日

雨沐天容霽欲流
好山誇翠出墻頭
黃花憔悴東籬晚
一段陶家冷淡秋

雨後

西風無意嫪纖雲
掃盡千峰雨脚痕
一片秋光清

似水家家空翠滿柴門

紫泉亭

西風禾黍亂蒼黃滿眼秋山冷翠長一片白雲攜
雨去人家籬落半斜陽

景覃

一首

覃字伯仁華陰人年十八有賦聲大定初
三赴廉試後以病不就舉博極羣書有舉
問者立誦數百言不休又從而講說之爲
人誠實樂易不修威儀隱居西陽里以種
樹爲業落托嗜酒醉則浩歌日以爲常作
詩有功樂府亦可傳予同年進士王元禮
嘗從之學說伯仁老不廢書有勸以養目

力者曰吾輩非讀書則無所用心要當死
而後已耳晚年於易有所得年七十終於
家自號渭濱野叟有集傳關中

感事

蘭芳切禁當門種李苦何傷竝道生自古英雄足
猜忌莫教身外有浮名

段繼昌 五首

繼昌字子新白水人自號適安居士喜作
詩與華陰景伯仁相友善家甚貧而世間
事皆不以挂口有以錢遺之者必盡送酒
家名酒曰黃嬌蓋關中人謂兒女爲阿嬌
子新以酒比之故云一日天苦寒人有遺
之酒者飲不盡而醉夜半忽驚起以衣衾
覆酒缸僵臥榻上人爲言酒自不冰先生

將不爲寒所病乎子新笑曰人病尚可酒
病不可療也其好飲如此臨終辭鄉里託
以他適明日臥於党氏園亭大石上視之
已逝矣伯仁弔之云適安居士舊知聞廓
達靈根厭世紛辭罷親朋便歸去一籌今
日又輸君

梨花

一林輕素媚春光透骨濃薰百和香消得太真吹

玉笛小庭人散月如霜

一溪

一溪流水走青蛇春在江邊漁父家竹外寒梅看
欲盡清香移入小桃花

春早二首

魚兒水汎鴨頭綠野馬塵飛羊角風西崦山家籬
落背杏梢初見一分紅

斷冰銷盡荻芽尖凍壠蘇來白薺添幾片野雲飛

不去晚風吹作雨纖纖

讀紀信傳

鹿走中原兩虎爭
滎陽圍解事堪驚
當時拔劍論功者
矢口何人說紀生

附蒲城志金進士六人繼昌其一曾任御

史

岳行甫 二首

行甫字仁老鄜州洛川人在關中最有詩名
泰和初有以仁老時病詩達之道陵者
道陵大加賞異授以官不就士論高之舊
所傳沾泥柳絮燕銜去鎖月梨花鸞喚開
本前人詩又苦無佳致世俗識真者少悞
謂仁老所作乃闕傳之會見仁老詩百餘
篇佳句甚多續當就秦中好事家搜訪之

謝人惠二小漆冠

規製新翻出杜郎最宜閨子夜燒香不爭寶髻峩
宮樣自與霓裳配道裝細攏翠鬟雲易滿淺銜牙
櫛月難藏水衡雙寄非無意要買楊枝惱孟光

立春日

銀線青絲翠椀堆爭牛擊鼓欲驚雷翻風鬪巧春
頭勝漉雪浮香臘尾盃迎暖梢梢金著柳逗寒葉
葉粉飄梅不成一事人空老半百光陰又七迴

迂齋周馳

二首

馳字仲才濟南人經學出於醇德先生王
廣道賦學出於泰山李時亨至於党趙又
其忘年友也資性古雅而以襟量見稱大
定中住太學屢以策論魁天下私試亦頻
中監元家素饒財鄉人強以子弟從之學
所得束修皆散諸生之貧者貞祐之兵濟
南陷不肯降攜二孫赴井死鄉人葬之宅

後之壽樂堂遼東人吳子英嘗從仲才學
能記其所著亞父撞玉斗賦及他文數篇

箸詩

章廟御題
限紅字韻

矢束形何短籌分色盡紅駢頭斯効力失偶竟何
功比數盤盂側經營指掌中蒸豚挑項臠湯餅拌
油葱正使遭讒口何嘗廢直躬上前如許借猶足
沃淵衷

斲子

私盍反
支起也

勿以微才棄安危任不輕誰憐一片小能使四方
平凡案由吾正盤盂免爾傾何當遇夷坦沈默更

何營

此詩王仲澤所傳或以爲仲澤作也以其
與周仲才詩意相近姑附於此以俟更攷

劉太常鐸 七首

鐸字文仲冀州棗強人承安五年進士元
光二年入爲太常博士正大初改兵部員
外郎以武昌軍節度副使致仕癸巳歲病
歿於京師自號柳溪先生有集傳於家武
成王著作序言文仲生未能言已識百餘
字及授學穎悟過人爲人誠實少許可不
徇流俗不慕榮利益實錄云子敏中字庭

全金詩卷三十二
三
幹亦學詩今居洛中

三陽述懷

蟻穴吾猶夢蝸廬此僅容一川青靄合半嶺白雲
封地僻宜藏拙官閒足養慵只慙無補報潦倒不
歸農

卽事

亦在三陽時作

地與中州迴民餘上古淳峽長深束渭路險曲通
秦煙柳千家曉風花百里春一官如自擇閒處著

閒身

澠池驛舍用苑極之郎中韻

慣從鞍馬作生涯宿處依依認是家爐火相看衣
袖暖盤飧未辦驛廚譁淹留歲月頭如雪汨沒風
塵眼更花永夜如何得消遣新詩吟罷自煎茶

春日

翠微深處幾人家風颺輕烟雨壓沙寒勒野桃開
較晚向陽纔有兩三花

所見

綸竿老子綠蓑衣
細雨斜風一釣磯
正是鄰家社
醅熟柳條穿得錦鱗歸

讀李訓鄭注傳二首

誰教闔宦作權臣
肅代優游到敬文
三子謀疎誰
不道洩機也合罪劉蕡

綦醫入侍本防猜
偶失機權亦可哀
陳竇至今佳
傳在莫從成敗論人材

全
全
語
卷
三
十
二

三

